

Prof. dr. Nihad Kapetanović



Dana 14. aprila 2021. godine u 89. godini života preminuo je prof. dr. sc. Nihad Kapetanović, profesor emeritus Građevinskog fakulteta Univerziteta u Sarajevu. Na sarajevskom groblju Vlakovo su se 17.04.2021. godine brojni prijatelji, kolege i nekadašnji studenti, s istinskim osjećajem zahvalnosti na svemu što je učinio, posljednji put oprostili od uvaženog profesora.

Rođen je 24. aprila 1932. godine u Gornjoj Zelinji, općina Gradačac. Studirao je na Geodetskom odsjeku Tehničkog fakulteta u Zagrebu, gdje je 1956. godine diplomirao sa odličnim uspjehom. Poslijediplomski studij za magistra geodezije pohađao je na Građevinskom fakultetu u

Beogradu i 1972. godine, kao prvi kandidat na Geodetskom odsjeku, stekao naučni stepen magistra tehničkih nauka iz oblasti geodezije. Doktorsku disertaciju odbranio je 1978. godine na Građevinskom fakultetu u Beogradu. Od 1957. godine do odlaska u penziju 2002. godine radio je na Univerzitetu u Sarajevu, gdje je prošao sva zvanja od asistenta do redovnog profesora, a 2007. godine dobio je počasno zvanje profesora emeritusa. Omogućio je studentima i geodetskim stručnjacima u Bosni i Hercegovini da imaju literaturu po kojoj će moći učiti i moderno raditi obzirom da je napisao 8 knjiga (udžbenika, priručnika) i jedna skripta. Objavio je preko 30 naučnih i stručnih radova, a učestvovao je i na realizaciji 9 važnijih projekata. Predavanja je savjesno pripremao, tako da su bila jasna i studenti su ih voljeli. Izvanredan mu je bio kontakt sa studentima, tako da su ga osjećali kao roditelja. Zahvaljujući dobrim dijelom njemu, studenti su se poslije diplomiranja veoma dobro snalazili u praksi, uspješno izvršavajući i rukovodeći geodetskim radovima na mnogim projektima u zemlji i inostranstvu. U više od 45 godina dugom radu na Univerzitetu u Sarajevu učestvovao je u edukaciji preko 2000 studenata na Građevinskom fakultetu i Šumarskom fakultetu, neprekidno pomažući mlađim kolegama da napreduju i razvijaju se naučno i pedagoški, a i svim ljudima s kojima je kontaktirao nastojao je pomoći. Pored njegovih naučnih, nastavnih i stručnih kvaliteta neosporna je i etička strana njegove ličnosti.

Izuzetno zapaženu ulogu profesor Kapetanović imao je i u SUGGSUBIH, obavljajući zahtjevne funkcije glavnog i odgovornog urednika časopisa "Geodetski glasnik" od 1999. do 2004. godine, zamjenika glavnog i odgovornog urednika u razdoblju od 1987. do 1998. godine, te člana Uredničkog odbora. Mnogo je učinio na afirmaciji i povećanju relevantnosti „Geodetskog glasnika“, između ostalog i kroz objavljivanje 10 naučnih radova u kojima je obrađivao tada savremene geodetske probleme, počevši od prvih elektrooptičkih daljinomjera.

Kroz svoj rad je ugledni prof. dr. sc. Nihad Kapetanović na najbolji način doprinio javnoj afirmaciji, razvoju i podizanju nivoa nastave i osavremenjivanju geodetske struke u Bosni i Hercegovini.

S pravom se može reći da odlazak profesora Nihada Kapetanovića predstavlja nenadoknativ gubitak za bosanskohercegovačku akademsku zajednicu, geodetsku struku i cjelokupno društvo. Velika postignuća profesora Kapetanovića u nastavi, struci i nauci ostat će u neizbrisivom sjećanju njegovih kolega i saradnika, te mnogobrojnih generacija njegovih studenata, koji će lijepu uspomenu na njega pažljivo njegovati i čuvati.

Jusuf Topoljak i Nedim Tuno